

禮儀典第二百八十八卷

宴饗部彙考八

元

太宗六年大會諸王百寮 按元史太宗本紀六年春會諸王宴射于斡兒寒河夏五月帝在達蘭達葩之地大會諸王百寮諭條令曰凡當會不赴而私燕者斬

太宗八年春正月諸王各治具來會宴萬安宮落成 按元史太宗本紀云云

憲宗六年春大會諸王百官 按元史憲宗本紀六年丙辰春帝會諸王百官于斡兒陌哥都之地設宴六十餘日

憲宗九年春正月乙巳朔駐蹕重貴山北置酒大會 按元史憲宗本紀云云

世祖中統元年魏初奏錫宴宣肅威儀帝納之 按元史世祖本紀不載 按續文獻通考中統元年監察御史魏初上疏曰臣聞君猶天也臣猶地也尊卑之禮不可不肅方今內有太常有史官有起居注以議典禮記言動外有高麗安南使者入貢以觀中國之儀昨聞賜宴大臣威儀弗謹非所

以尊朝廷正上下也疏入帝欣納之

至元八年定燕饗之禮多從本俗 按元史世祖本紀不載 按禮樂志元之有國肇興朔漢朝會

燕饗之禮多從本俗世祖至元八年命劉秉忠許衡始制朝儀而大饗宗親錫宴大臣猶用本俗之禮爲多

仁宗延祐二年夏四月辛巳賜進士恩榮宴于翰林院 按元史仁宗本紀云云

文宗天曆元年九月丙申燕鐵木兒入朝賜宴興聖殿 按元史文宗本紀云云

明宗天曆二年四月宴諸王大臣于行殿八月宴皇太子及諸王大臣于行殿 按元史明宗本紀

天曆二年正月帝卽位于和寧之北夏四月甲午帝宴諸王大臣于行殿癸卯遣武寧王徹徹禿及哈八兒禿立文宗爲皇太子八月丙戌皇太子入見是日宴皇太子及諸王大臣于行殿

文宗至順元年秋九月己亥以奎章閣纂修經世大典命省院臺諸司以次宴其官屬 按元史文

宗本紀云云

至順三年五月宴燕鐵木兒于流盃池八月寧宗卽位十月詔有只孫衣者與宴皆服以侍 按元

史文宗本紀至順三年五月賜燕鐵木兒宴于流盃池 按寧宗本紀至順三年八月己酉文宗崩十月庚子帝卽位于大明殿詔百官及宿衛士有只孫衣者凡與宴饗皆服以侍其或質諸人者罪之

順帝元統二年秋七月壬辰帝幸大安閣是日宴侍臣于奎章閣 按元史順帝本紀云云

明

太祖洪武二年定蕃王來朝及親王文武官宴禮 按明會典國初諸蕃來朝必見皇太子及親王皇帝親御殿待宴後止朝見上賜宴會同館命禮部待之洪武二年定朝見禮畢擇日錫宴于謹身殿拱衛司設黃麾仗于殿庭左右內使擎執如奉天殿受朝賀儀內使監陳設御座于殿中皇太子座于御座東偏稍南諸王座皆以次而南俱西向又設諸王座于西偏與東偏諸王座相對俱東向蕃王座于殿中之西第一行東向次設文武一品陪宴座第二行二品三品三行俱東西相向蕃王從官文武三品陪宴官俱以序坐于西廡東向北上和聲郎陳大樂細樂舞隊于殿之南楹光祿寺設御尊于殿中之南皇太子諸王蕃王至二品官酒尊于殿門左右之東西御位司壺二人尙酒尙

食二人東偏皇太子諸王司壺二人奉酒食二人西偏諸王如之蕃王司壺一人奉酒食一人文武
官第一行及左右第二行各司壺四人兼供酒食光祿寺直長于西廡各置酒尊及司壺供酒食之
人光祿寺卿陳御食案及皇太子諸王食案寺丞設蕃王食案于殿中直長設殿上左右文武官及
西廡食案各于其座前諸執事者各供事舍人引文武官常服侍立于殿門之左右又引蕃王服其
國服侍立于百官之北引進引皇太子諸王常服侍立殿內之左右侍儀導引皇帝常服陞御座大
樂鼓吹振作鳴鞭樂止皇太子諸王各就座禮部官取旨導蕃王入就座光祿寺卿舉御食案進于
御前禮部侍郎光祿寺少卿舉食案置于皇太子諸王之前禮部郎中光祿寺丞舉食案置于蕃王
前文武官及蕃王從官各以次就坐內使監令于御前斟酒司壺于皇太子諸王以下各斟酒細樂
作奏太清之曲和聲郎北面立舉手唱上酒皇帝舉爵飲皇太子以下皆飲畢樂止酒再行細樂作
奏感皇恩之曲飲畢樂止內使監令于御前進食供事者自皇太子以下各供食大樂作和聲郎唱
上食皇帝進食皇太子以下皆食畢樂止酒三行細樂作奏賀聖朝之曲飲畢樂止進食奏大樂食
畢樂止凡五進食皆如之酒四行細樂作奏普天樂之曲飲畢樂止進食酒五行細樂作舞諸國來

朝之舞飲畢樂舞止進食酒六行細樂作奏朝天子之曲飲畢樂止進食酒七行細樂作奏醉太平之曲舞長生隊之舞飲畢樂舞止進食其西廡斟酒進食之次亦如殿中惟不用樂宴畢皇帝興樂作皇太子諸王侍從還宮樂止蕃王文武官俱以次出東宮擇日宴蕃王是日宿衛陳設如朝會儀中書省大都督府御史臺俱取旨宴樂又洪武初定凡親王來朝若遇大宴會諸王不入筵宴中若欲筵宴于便殿去處精潔菜飯叙家人禮羣臣大宴中王並不入席凡文武官遇筵宴洪武初令四品以上官文東武西各照品級上殿侍坐五品以下于殿下丹墀內文東武西各照品級序坐其奉特旨賜殿內坐者不在此限如在奉天門則四品以上官坐于門上五品以下官坐于丹墀內務要容止恭肅不許攙越喧嘩

洪武十一年旌別朝覲官爲三等賜宴有差 按明會典凡朝覲官旌別洪武十一年令察其言行功能第爲三等稱職而無過者爲上賜坐而宴有過而稱職者爲中宴而不坐有過而不稱職者爲下不預宴序立于門宴者出然後退

洪武二十年令百官遇筵宴奏事履鞋上殿元壽聖節宴羣臣國戚 按明會典洪武二十年令百

官于奉天華蓋謹身武英等殿筵宴奏事須穿履鞋方許上殿違者從禮部官監察御史儀禮司糾舉送法司如律 按續文獻通考洪武二十年九月乙未天壽聖節受朝賀宴羣臣于奉天殿皇

太子宴國戚暨東宮官于文華殿

洪武二十二年大宴羣臣于文華殿 按續文獻通考洪武二十二年上御奉天殿受朝賀大宴羣臣于文華殿皇太子宴東宮官屬于文華殿高麗遣使貢方物進賀

洪武二十六年定賜宴禮儀 按明會典大宴儀洪武二十六年定是日尙寶司設御座于奉天殿錦衣衛設黃麾于殿外之東西金吾等衛設護衛官二十四員于殿東西教坊司設九奏樂歌于殿內設大樂于殿外立三舞雜隊于殿下光祿寺官設酒亭于御座下之西膳亭于御座下之東珍羞醢醢亭于酒膳亭之東西設御筵於御座之東西設羣臣四品以上位於殿內之東西設羣臣酒尊食卓于殿外設五品以下位卓于東西兩廊司壺尙食各供乃事引禮引羣臣殿外東西相向立儀禮司跪奏請陞座駕興大樂作陞座鳴鞭樂止鳴贊引文武官四品以上由東西門入殿中橫班北向立五品以下官列于殿外丹墀北向立樂作贊四拜樂止光祿寺官進御筵大樂作捧案至御前

樂止進花樂作進訖樂止光祿寺官開爵注酒捧詣御前進第一爵酒教坊司跪奏一奏炎精開運之曲贊內外官皆跪教坊司跪奏進酒飲畢贊衆內外官俯伏興樂作贊四拜平身樂止贊各就位序班隨進羣臣卓散花樂作散訖樂止序班卽進羣臣盞第二爵酒教坊司跪奏二奏皇風之曲樂作光祿寺官斟酒御前序班隨斟羣臣酒教坊司跪奏進酒候皇帝舉酒羣臣以次舉飲訖樂止光祿寺官進湯鼓吹響節前導至殿外鼓吹止殿上樂作羣臣起立光祿寺官進湯御前羣臣復位序班卽供羣臣湯樂止教坊司跪奏進湯樂作候皇帝舉箸羣臣次舉皇帝進湯訖贊饌成樂止武舞入教坊司跪奏平定天下之舞舞畢出第三爵酒教坊司跪奏三奏睿皇明之曲樂作進酒如前儀樂止教坊司跪奏撫安四夷之舞舞畢出第四爵酒教坊司跪奏四奏天道傳之曲樂作進湯如前儀儀食畢教坊司跪奏車書會同之舞舞畢出第五爵酒教坊司跪奏五奏振皇綱之曲進酒如前儀飲畢教坊司跪奏百戲承應舞畢出第六爵酒教坊司跪奏六奏金陵之曲進酒進湯如前儀教坊司跪奏八蠻獻寶進呈舞畢出第七爵酒教坊司跪奏七奏長楊之曲進酒如前儀教坊司跪奏採蓮隊子承應畢出第八爵酒教坊司跪奏八奏芳醴之曲進酒進湯如前儀儀食畢教坊司跪奏魚躍

于淵承應畢出第九爵酒教坊司跪奏九奏駕六龍之曲進酒如前儀飲訖光祿寺官收御前爵序班隨收羣臣盞光祿寺官進湯進大膳大樂作羣臣起立進訖復坐序班隨供羣臣飯教坊司跪奏進膳食訖贊膳成樂止光祿寺官收膳訖教坊司跪奏百花隊舞承應舞畢出鳴贊唱撤案序班撤羣臣卓訖光祿寺官卽撤御案贊宴成羣臣皆出席北向立序班卽撤羣臣座殿外官皆詣丹墀北向立贊鞠躬樂作贊四拜興平身樂止羣臣分東西立儀禮司跪奏禮畢駕興大樂作鳴鞭百官以次出中宴常宴凡中宴禮儀同大宴但進酒七爵凡常宴同中宴但百官一拜三叩頭進酒或三爵或五爵而止

又洪武二十六年定凡遇正旦聖節冬至或吉慶筵宴所用諸品膳羞酒醴並須提調光祿寺供辦若管待諸蕃國朝貢等使客併外國來降土官人等茶飯物料禮部自行備辦其宴之日起會同館管待令教坊司供應若奉旨管待之人俱於本部筵宴正官主席一土官使客至會同館除柴米鋪陳本館應付外本部照依正從名數每五日一次支送下程一管待物料先期一日本部劄委膳部照依時價收買仍令物戶親齎赴部對物給價其合用羊隻主事廳具手本赴光祿寺關領原編羊隻一勘合於司牧局照號關取造辦管待畢日仍回呈本部開具買何物件同支過

價鈔數目主事廳回呈關過羊隻字號毛色觔重本部判送立案通類開銷一買辦管待物料鈔貫若支銷盡絕本部照例具奏依數關領鈔錠回部收貯在庫聽候買辦如支銷已盡依上關用又筵宴蕃夷土官桌面洪武二十六年每正一桌果子五色按酒五色湯三品小割正飯用羊

洪武二十七年更定蕃王來朝禮凡遇宴會蕃王班次在侯伯之下 按明會典云云

成祖永樂元年定筵宴蕃夷桌面 按明會典筵宴蕃夷土官桌面永樂元年定上桌按酒五盤果子五盤燒燂五盤茶食湯三品雙下大饅頭羊肉飯酒七鍾中桌按酒果子各四盤湯二品雙下饅頭牛馬羊肉飯酒五鍾

永樂六年令帝王生日先於宗廟具禮致祭然後序家人禮百官慶賀禮畢筵宴 按明會典云云

永樂七年定四夷來朝循例宴賞 按明會典東宮監國永樂七年定宴賞凡四夷來朝循例宴之

皇太子命禮部遣人送行在所正使人給鈔十錠從人五錠爲道里費其每日賞賜有例者循例無例者臨時斟酌賞之又尙師法王永樂間來朝經過府分茶飯管待還亦如之可脫卽永樂間使臣進貢經過府分茶飯管待至良鄉令光祿寺辦送茶飯接待納失者罕王永樂間筵宴一次使臣回

至保定真定彰德衛輝懷慶河南各府潼關衛陝西布政司平涼府甘肅茶飯管待米昔兒永樂間筵宴一次使臣回至良鄉湯飯甘肅管待一次馬哈麻王永樂間筵宴一次使臣進貢經過有司茶飯管待哈烈永樂間筵宴一次使臣朝貢經過府衛茶飯管待至涿州良鄉令光祿寺辦送茶飯接待回還自良鄉抵陝西布政司經過府州茶飯管待火州淳泥國乞力麻兒阿速地面八答黑商忽魯謨斯國乞兒蠻米兒哈蘭甘把里國柯枝國白松虎兒古里國答兒密那姑兒南亭里永樂間筵宴一次失刺思亦思把罕柳陳城永樂間筵宴一次使臣回經過府衛茶飯管待

永樂十三年聖節及進士恩榮筵宴 按明會典聖節筵宴永樂十三年上桌按酒五盤果子五盤茶食燒燂鳳雞雙棒子骨大銀錠大油餅湯三品雙下饅頭馬肉飯酒五鍾上中桌按酒四盤果子四盤燒燂銀錠油餅雙棒子骨湯三品雙下饅頭馬肉飯酒三鍾中桌按酒四盤果子四盤燒燂茶食湯二品雙下饅頭羊肉飯酒三鍾僧官等用素桌按酒五盤果子茶食燒燂湯三品雙下饅頭蜂糖糕飯將軍按酒一盤壽麪雙下饅頭馬肉飯酒一鍾金鎗甲士象奴校尉雙下饅頭酒一鍾教坊司樂人按酒一盤粉湯雙下饅頭酒一鍾給儀內官內使上桌按酒五盤果子湯二品小饅頭酒三

鍾中桌按酒四盤果子湯二品小饅頭進士恩榮宴永樂十三年上桌按酒燒燂四盤寶粧茶食果子五盤輓按酒五盤菜四色湯三品雙下大饅頭羊肉飯酒五鍾上中桌按酒燒燂四盤寶粧茶食果子四盤輓按酒四盤菜四色湯三品雙下饅頭羊肉飯酒五鍾

永樂十五年筵宴蘇祿國一次按明會典蘇祿國永樂十五年筵宴一次國王來朝經過府衛茶飯管待回還亦如之

永樂二十二年令皇親遇節均照例賜鈔若大臣不預宴公侯伯都督尙書賜鈔一千貫侍郎五百貫按明會典云云

永樂年更定諸宴儀制按明會典續定大宴儀是日陳設如前儀駕自右順門至奉天門丹陛大樂作陞座鴻臚寺官贊拜百官四拜興平身樂止光祿寺官進御筵內官捧案進膳樂作設案畢樂止內官進花進膳樂作進訖樂止教坊司跪奏一奏上萬壽之曲侑食樂作內官斟酒捧爵至御案前鴻臚寺贊跪文武百官皆跪教坊司跪奏進酒鴻臚寺官贊俯伏興平身樂止贊各就位百官就坐簪花訖教坊司跪奏平定天下之舞舞畢出教坊司跪奏二奏仰天恩之曲樂作內官斟酒

捧爵至御案前教坊司奏進酒進酒畢樂止殿外導湯樂作至殿內迎湯樂作內官捧湯至御案前
教坊司奏進湯樂作鴻臚寺官贊饌成內官撤湯樂止教坊司奏黃童白叟鼓腹謳歌承應舞畢奏
撫安四夷之舞舞畢教坊司跪奏三奏感地德之曲樂作進酒如前儀樂止教坊司跪奏事書會同
之舞舞畢教坊司跪奏四奏民樂生之曲樂作進酒如前儀樂止殿外導湯樂作至殿內迎湯樂作
內官捧湯至御案前教坊司奏進湯樂作鴻臚寺官贊饌成內官撤湯樂止教坊司跪奏表正萬邦
之舞舞畢教坊司跪奏五奏感皇恩之曲樂作進酒如前儀樂止殿外導湯樂作至殿內迎湯膳
樂作內官捧湯膳至御案前教坊司奏進膳樂作鴻臚寺官贊饌成內官撤湯膳并御筵樂止教坊
司跪奏天命有德之舞舞畢奏纓鞭德勝蠻夷隊舞承應畢教坊司更進致語畢鴻臚寺官復贊四
拜興平身樂止鴻臚寺官跪奏禮畢 諸宴通例凡大祀天地次日慶成大宴文武百官及四夷使
臣土官人等其位次公侯駙馬伯文職四品以上及學士武職都指揮使以上陞殿東西侍坐學士
坐於文職四品官之上翰林院左右春坊經筵官六科都給事中左右給事中尚寶司卿少卿司丞
通政司參議大理寺寺丞國子監司業翰林院帶俸參議太常寺寺丞鴻臚寺少卿寺丞順天府治

中欽天監監正監副太醫院院使院判神樂觀提點道錄司知觀等官中左門序坐皇親都指揮同知僉事達官都指揮同知僉事署都指揮僉事皇親正副千戶百戶所鎮撫兵馬副指揮外國副使野人女直都指揮等官中左門序坐翰林院修撰等官六科給事中監察御史中書舍人陪祀郎中員外郎五府經歷都察院經歷都事照磨檢校司務翰林院帶俸官太常寺典簿博士等官犧牲所千百戶詹事府主簿通事舍人鴻臚寺署丞主簿序班欽天監五官等官太醫院御醫達官指揮使同知僉事正千戶副千戶百戶所鎮撫外國四夷人等丹墀東序坐指揮使指揮同知陪祀指揮同知僉事外國四夷人等丹墀西序坐其過朝覲各布政司方面行太僕寺卿運使知府官員陪祀者與宴方面官列於中左門班次卿運使知府列於東丹墀班次衍聖公張真人與宴列於二品文官班次其餘真人領宴及以事故者亦領宴其法王佛子國師禪師僧官刺麻俱於大慈恩寺宴內官一員待宴先期禮部行各衙門開與宴官員職名畫位次進呈仍懸長安門示衆宴之日糾儀御史四人二人立於殿東西二人立於丹墀左右錦衣衛鴻臚寺禮科亦各委官糾舉凡立春元宵四月八端陽重陽臘八等節永樂間俱於奉天門通賜百官宴用樂其後賜宴日早朝畢光祿寺面奏百

官入班行叩頭禮禮畢駕還宮百官出宴於午門之外不用樂宴畢百官復向闕行叩頭禮禮畢乃退凡東宮千秋節永樂間賜五府六部等衙門堂上官左右春坊科道近侍錦衣衛隨駕帶刀指揮千戶等官及天下進箋官宴於文華殿并文華門東西廊下王府進箋官并外國使臣宴於禮部正巨節永樂間上桌茶食像生小果子五盤燒燂五盤鳳雞雙棒子骨大銀錠大油餅按酒五盤菜四色湯三品簇二大饅頭馬牛羊肥肉飯酒五鍾上中桌茶食像生小果子五盤按酒五盤菜四色湯三品簇二大饅頭馬牛羊肥肉飯酒五鍾中桌果子五盤按酒四盤菜四色湯二品簇二饅頭馬豬牛羊肥肉飯酒三鍾隨駕將軍按酒細粉湯椒醋肉并頭蹄簇二饅頭豬肉飯酒一鍾金鎗甲士象奴校尉雙下饅頭教坊司樂人按酒燒牛肉雙下饅頭細粉湯酒一鍾立春節永樂間上桌按酒四盤春餅一櫟菜四色湯一碗酒三鍾中合桌按酒四盤春餅二櫟菜四色湯二碗酒六鍾元宵節永樂間上桌按酒四盤果子茶食小饅頭菜四色粉湯圓子一碗酒三鍾中合桌按酒四盤果子茶食小饅頭菜四色粉湯圓子二碗酒六鍾四月八節永樂間上桌按酒二盤不落莢一櫟涼糕一櫟小點心一櫟菜四色湯一碗酒三鍾中合桌按酒二盤不落莢一櫟涼糕一櫟小點心一櫟菜四

色湯二椀酒六鍾端午節永樂間上桌按酒五盤果子小饅頭湯三品糕一櫟粽子一櫟菜四色酒五鍾中桌按酒四盤果子小饅頭湯三品糕一櫟粽子一櫟菜四色酒五鍾教坊司樂人按酒一盤湯飯酒一鍾重陽節永樂間上桌按酒二盤糕二櫟小點心一櫟菜四色湯一椀酒三鍾中合桌按酒二盤小點心一櫟糕二櫟菜四色湯二椀酒六鍾冬至節永樂間上桌按酒五盤果子五盤茶食湯三品雙下饅頭馬羊肉飯酒五鍾中桌按酒四盤果子四盤茶食湯三品雙下饅頭酒五鍾將軍按酒一盤雙下饅頭粉湯酒一鍾金鎗甲士象奴校尉雙下饅頭教坊司樂人按酒一盤雙下饅頭粉湯酒一鍾

宣宗宣德三年宴朝鮮諸國各二次使回令所至地方官茶飯管待 按明會典朝鮮國筵宴二次宣德三年使臣回還薊州永平府茶飯管待占城國琉球國瓜哇國暹羅國各筵宴二次使臣回還至廣東布政司茶飯管待一次哈密筵宴二次使臣回還至良鄉湯飯陝西布政司茶飯管待一次阿丹國左法兒國天方國加異勒國黑葛達國哈失哈力宣德間筵宴一次日本國筵宴二次使臣回還至寧波府管待一次宣德間使臣至通州湯飯令行在光祿寺辦送至濟寧州浙江布政司并

寧波府茶飯管待錫蘭山筵宴二次使臣回至廣東布政司管待一次

宣德六年萬壽節賜宴尙書等官 按續文獻通考宣德六年二月萬壽聖節上御製詩一章賜尙

書蹇義胡濙大學士楊士奇楊榮且曰朕茂膺天眷惟爾四人贊翊之功賜宴盡歡而罷詩曰九天
日月絢祥光萬歲慈幃樂壽康初度幸逢全盛日贊襄有道賴賢良

宣德七年宴黑婁等朝貢使 按明會典黑婁筵宴二次宣德七年使臣朝貢至潼關陝西甘肅管

待土魯番筵宴二次使臣回至良鄉湯飯陝西布政司管待一次滿刺加國筵宴二次使臣回至廣

東布政司管待一次

宣德八年宴朝鮮黑婁等使 按明會典宣德八年命朝鮮黑婁琉球陪臣列於殿內東西班後侍

坐滿刺加國筵宴二次宣德八年國王朝貢廣東布政司并南雄贛州臨江淮安濟寧各府州茶飯

管待至通州令行在光祿寺辦送茶飯接待

宣德 年賜給不與宴朝官節錢 按明會典凡正旦冬至萬壽聖節洪武永樂間大宴並如慶成

儀宣德間朝官不與宴者給賜節錢鈔錠各處進表官亦令與宴免宴則通賜節錢 又宣德以後遇